

04 SEP 1996

ASEAN-India

INDIA ANGGAP STATUS RAKAN DIALOG PENUH SEBAGAI SATU KEMAJUAN

Oleh: Mahesh Prasad

NEW DELHI, 4 Sept (Bernama) -- India menganggap penerimaannya sebagai rakan dialog penuh ASEAN sebagai satu kemajuan dalam Dasar Pandang ke Timurnya.

"Status baru yang diberikan kepada India ini menunjukkan kepada sifat saling menyokong yang terkandung dan sedang muncul antara ekonomi ASEAN yang dinamik dan sedang pesat bergabung dan ekonomi India yang luas," kata Laporan Tahunan Kementerian Luar India 1995-96.

Katanya perhatian yang istimewa akan terus diberi kepada usaha ke arah memupuk hubungan ekonomi dan politik yang erat dengan negara-negara ASEAN.

Laporan itu membuat rujukan khas kepada lawatan bekas Perdana Menteri India, P.V. Narasimha Rao ke Malaysia dan lawatan Menteri Kanan Singapura Lee Kuan Yew ke India, yang "menyumbang kepada persefahaman bersama yang semakin meningkat".

Akhbar-akhbar India yang menyiarkan rencana-rencana khas dan bahan berita mengenai hubungan Indo-ASEAN pada masa lawatan Menteri Luar India Inder Kumar Gujral ke Malaysia juga membuktikan India mengambil penting hubungannya dengan ASEAN.

Negara itu sekarang tidak sabar menunggu lawatan Perdana Menteri Malaysia, Dr Mahathir Mohamad yang akan menerima Anugerah Jawahar Lal Nehru untuk Persefahaman Antarabangsa yang djangka pada bulan November depan. Persiapan sedang dibuat di New Delhi dan Kuala Lumpur untuk menjadikan lawatan itu satu acara yang tidak mudah dilupa.

"Hubungan dua hala dengan Malaysia terus baik. Kemuncaknya ialah lawatan Perdana Menteri Narasimha Rao ke Malaysia pada Ogos 1995," kata laporan itu.

Mengenai perdagangan dua hala dengan Malaysia, laporan itu berkata ia terus meningkat dengan nilah keseluruhannya mencapai AS\$765 juta dalam tempoh tahun 1994-95 dibandingkan dengan AS\$488 juta bagi 1993-94.

Cadangan pelaburan dari Malaysia berjumlah AS\$101 juta telah diluluskan sehingga akhir Ogos 1995 menjandikannya pelabur yang ke enam terbesar, kata laporan itu.

Perdagangan India dengan Malaysia hampir berganda kepada AS\$1220 juta bagi tempoh April 1995 hingga Mac 1996 dari AS\$696 juta pada tempoh sebelum itu, menurut angka yang dikeluarkan oleh Kementerian Perdagangan. --

BERNAMA

MP WAT